



Komunikado

13 di febrüari 2019

Cft: Kambio rápido ta nesario pa yega na presupuesto balansá

Philipsburg – Kolegio di Cft ta warda ku interes pa risibí e presupuesto adaptá di 2019 i e plannan pa restrukturá e serviso di impuesto i pone maneho finansiero na òrdu. Cft a deliberá ku e Minister di Finansa tokante di adaptashon di e presupuesto i a hasi un yamada pa finalisá e plannan riba término korto.

Sint Maarten ta traha for di prinsipio di e aña aki riba un presupuesto adaptá di 2019. Konforme konseho anterior di Cft a ahustá i redusí e gastunan presupuestá, loke ta resultá den un défisit mas abou. Pa por transformá e défisitnan den surplus struktural, Sint Maarten tin intenshon di entre otro restrukturá e serviso di impuesto, i a traha un konsepto di un plan pa logra esei. Cft ta rekonosé ku ta nesario pa fortifiká e serviso di impuesto, pa di e manera ei kumplimentu ku deber di paga impuesto (compliance) subi i entradanan di gobièrnu por sigui oumentá. Cft a konsehá Sint Maarten pa tuma e pasonan nesario pa por kuminsá ehekutá e plan riba término kòrtiku. E konseho aki ta konta tambe pa e plan pa mehorá e maneho finansiero. Den òktober Sint Maarten a primintí ku próksimamente e lo entregá un plan di mehora, kual lo mester trese kuné ku e kuenta anual di 2021 lo por risibí un deklarashon aprobatorio di akountent.

Cft a pidi pa riba término kortiku tuma medida pa redusí gastunan di salubridat i di penshon. Cft a ekspresá su desapunto ku e promesa ku lo a ahustá e lei di penshon no a keda realisá promé ku promé di yanüari 2019. A entregá e lei na tempu den 2018 na Parlamento, pero esaki sinembargo no a kondusí na toma di desishon. Pa loke ta trata e retrasonan den pago di Sint Maarten, ta importante pa gobièrnu di Sint Maarten yega na palabrashon di pago ku e kreditoran di mas importante (SZV i APS), ku kual lo mester kumpli.

Cft atrobe a pidi atenshon pa finalisashon di e proseso di responsabilisashon di e añanan anterior. E kuantanan anual di 2013 i 2014 a keda entregá na Parlamento na 2018, pero ainda no a aprobá nan. Ainda no a entregá e kuantanan anual di 2015 i 2016 na Parlamento. Ainda mester traha e kuantanan anual di 2017 i 2018.

Sifranan di 2018 ta muestra un défisit mas abou ku loke tabata presupuestá. Esaki ta kousá prinsipalmente pa entradanan mas haltu kompará, sobre todo entradanan di impuesto. Apesar ku e défisit ta bahando, Sint Maarten tòg lo bai tin mester di sosten di likides pa 2018 i 2019. Sint Maarten a hasi petishon na Hulanda pa e sosten di likides, loke ta pone ku e kuota di debe den relashon ku Produkto Nashonal Bruto (GDP) lo oumentá. Un fianza ku ta planeá pa tuma pa hasi invershonnan di kapital i otro posibel aspektonan relashoná ku finansiamentu, por tin influensia riba desaroyo di e kuota di debe den relashon ku GDP. Cft lo keda ku bista riba e desaroyo di e kuota di debe den relashon ku GDP, ku e meta pa mantené un posishon sostenibel.

Kolegio di supervishon finansiero Kòrsou i Sint Maarten a bishitá Sint Maarten di 11 pa 13 di febrüari i a hiba kòmbersashon ku Gobernador, Minister di Finansa, Konseho di Minister, Konseho di Konsulta, direktor di e Ofisina di Proyecto di Restrukturashon i e Órgano di ehekushon di Seguro Sosial i di Malesa.

[Fin di komunikado]



Fotógrafo:

Edgardo Lynch

Teksto pa foto:

Sifranan provisorio di 2018 ta muestra un défisit mas abou ku loke tabata presupuestá.

Nota pa redakshon- no pa publikashon

Persona di kontakto na Cft:

Sekretariado Kolegio di supervishon finansiero

Manus Twisk- Sekretario

Telefon (+5999) 461-9081 / (+5999) 461-9082 / (+5999) 461-9084

Email info@cft.cw

Internet www.cft.cw

Persona di kontakto pa Prensa:

Jefka Martina

Telefon (+5999) 512-6861